

28. marts. 2019

UPA2019/28

**Issittup Imartaata qeqqani malittarisassaqaqngitsumik aalisarnerup pinngitsoortinnissaa pillugu isumaqatigiisummik Kunngerqarfiup Danmark-ip atuutsitsilernissaata Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut**  
(Aalisarnermut, Piniarnermut, Nunalerinermullu Naalakkersuisoq)

Issittup Imartaata qeqqani malittarisassaqaqngitsumik aalisarnerup pinngitsoortinnissaa pillugu isumaqatigiisummik atuutsitsilerniarneq siumumiit imatut oqaaseqarfigissavarput.

Ilulissani atsiortatigiitoqarnerata kingorna una suliassaq nanginneqartutut isigineqartariaqarpoq, tassa Nunat Qeqqertallu qalasersuup avannarliup tungaanut sineriallit paaseqatigiiffigalugu aammalu ataqqeqatigiiffiusumik unneqqareqatigiiffiusumillu iluarsiiiffigisariaqarpaat.

Qalasersuup avannarliup sikutoqarsuarmik ungalusimaneqarnerata aannikilliartuinnarnera aammalu saaliartuinnarneragaanera, pinngortitamut sunniutissai immap kissassusianut, sarfaanut, silap pissusianut, anorinut minnerunngitsumillu pisuussutitut uumassusilinnut uumaatsunullu, ilisimatuussutikut misissuiffigineqarluni, malinnaavigineqarluni, sulissutigineqarlunilu ingerlatsiffigineqartariaqarpoq.

Soorunami aamma siunissami qalasersuup avannarliup nakkutilliifigineqarnissaanut tunngasoq qalasersuarmut avannarlermut Nunat Qeqqertallu sineriallit isummersoqatigiiffigisagaat kaammatuutigisariaqarpoq, Nakkutilliineq, ilisimatusarneq, misissuinerillu kimit akilerneqassanersut aamma eqqartorneqartariaqarput.

Pinngortitap allanngoriatonerata kingunerisaanik qalasersuup avannarliup pisuussutai uumasusillit misissuilluareernikkut inuussutissarsiornikkut toqqammavissaqarpat nungusaataangitsumik toqqammaveqarluni ingerlanneqalersinnaaneri tamanna ammaffigineqartariaqarpoq, aammalu qalasersuup avannarliup pisuussutai uumaatsut misissuilluareernikkut aatsitassarsiornikkut toqqammavissaqarpat peqqissutsimut pingortitamut avatangiisinullu ajoqutaangippata tamanna aamma ammaffigineqartariaqarpoq, qalasersuarmut Nunat qeqqertat sineriallit nunallu inoqqavinit toqqammaveqartumik.

Siumumiit taamatut oqaaseqarluta siunnersuut taperserparput pisariaqartinneqarpallu ataatsimiititaliamut susassaartumut ingerlatinneqarnissaa ammaffigalugu.

Qujanaq

Henrik Fleischer, Siumut